

唐·實叉難陀《大乘入楞伽經》卷 2〈集一切法品 2〉：「如是藏識行相微細，唯除諸佛及住地菩薩，其餘一切二乘外道定慧之力皆不能知。唯有修行如實行者，以智慧力了諸地相善達句義，無邊佛所廣集善根，不妄分別自心所見，能知之耳。」¹

《大乘入楞伽經》卷 5〈剎那品 6〉：「此如來藏藏識本性清淨，客塵所染而為不淨，一切二乘及諸外道，臆度起見不能現證，如來於此分明現見，如觀掌中菴摩勒果。」²

《大乘入楞伽經》卷 5〈剎那品 6〉：「為勝鬘夫人說佛境界，非是外道二乘境界。大慧！此如來藏藏識是佛境界，與汝等比淨智菩薩隨順義者所行之處，非是一切執著文字外道二乘之所行處。」³

元魏·菩提流支《入楞伽經》卷 7〈佛性品 11〉：「阿梨耶識者，名如來藏，而與無明七識共俱，…離無常過離於我過自性清淨。」⁴

《入楞伽經》卷 7〈佛性品 11〉：「如來藏識不在阿梨耶識中，是故七種識有生有滅，如來藏識不生不滅。」⁵

《入楞伽經》卷 7〈佛性品 11〉：「若如來藏阿梨耶識名為無者，離阿梨耶識無生無滅，一切凡夫及諸聖人，依彼阿梨耶識故有生有滅，以依阿梨耶識故，諸修行者入自內身聖行所證，現法樂行而不休息。」⁶

《入楞伽經》卷 3〈集一切佛法品 3〉：「如來藏自性清淨，具三十二相，在於一切眾生身中，為貪瞋癡不實垢染、陰界入衣之所纏裹，如無價寶垢衣所纏，如來世尊復說常恒清涼不變。世尊！若爾外道亦說我有神我常在不變，如來亦說如來藏常乃至不變。世尊！外道亦說有常作者，不依諸緣，自然而有周遍不滅。若如是者，如來外道說無差別。」佛告聖者大慧菩薩言：「大慧！我說如來藏常，不同外道所有神我。大慧！我說如來藏空、實際、涅槃、不生不滅、無相無願等文辭章句，說名如來藏。大慧！如來、應、正遍知，為諸一切愚癡凡夫，聞說無我生於驚怖，是故我說有如來藏；而如來藏無所分別寂靜無相，說名如來藏。大慧！未來現在諸菩薩等，不應執著有我之相。…彼法無我離諸一切分別之相，智慧巧便說名如來藏，或說無我，或說實際及涅槃等，種種名字章句示現。我說如來藏不同外道說有我相。大慧！我說如來藏者，為諸外道執著於我，攝取彼故說如來藏，令彼外道離於神我妄想見心執著之處，入三解脫門，速得阿耨多羅三藐三菩提。大慧！以是義故，諸佛、如來、應、正遍知說如來藏，是故我說有如來藏，不同外道執著神我。是故大慧！為離一切外道邪見，諸佛如來作如是說，汝當修學如來無我相」⁷

¹ (CBETA, T16, no. 672, p. 594, b29-c5)

² (CBETA, T16, no. 672, p. 619, c27-p. 620, a1)

³ (CBETA, T16, no. 672, p. 620, a4-7)

⁴ (CBETA, T16, no. 671, p. 556, b29-c3)

⁵ (CBETA, T16, no. 671, p. 556, c11-13)

⁶ (CBETA, T16, no. 671, p. 556, c28-p. 557, a3)

⁷ (CBETA, T16, no. 671, p. 529, b19-c18)